

大乘阿毘達磨雜集論述記卷第十二

唐京兆大慈恩寺沙門窺基撰

復次蘊界處廣分別云何。嗢柁南曰。實有性等所知等。色等漏等。已生等。過去世等。諸緣等。云何幾種爲何義。

初頌總舉次長行釋。長行中分爲七段。以能等爲七所等。多少隨之。實有中所等有二。一假有。二世俗有。三勝義有。并能等有四。所知中所等有二。一。所識。二。所通達。并能等有二。色中所等有五。一。無色。二。有見。三。無見。四。有對。五。無對。并能等有六。有

漏中所等有十一。一無漏二有諍三無諍四有染
 五無染六耽嗜七出離八有為九無為十世閒十
 一出世并能等十二。已生中所等有七。一非已生
 二能取三所取四外門五內門六染汙七不染汙。
 并能等八。過去中所等有十四。一未來二現在三
 善四不善五無記六欲界七色界八無色界九有
 學十無學十一非學非無學十二見所斷十三修
 所斷十四非所斷并能等十五。緣中所等有十一。
 一四緣二同分三執受四根五苦苦六壞苦七行
 苦八有異熟九食十有上十一無上并能等十二。

此等六十之門。體義同故。類類各殊。不假徵其所
 等多少。六十五六以五十八門分別。顯揚第五。三
 十四門分別。多少不同。至支當出其同者更不出
 之。然五十六等。蘊界處各各別明。諸門分別。既非
 總故。不可徵之。必須下是然。第一百卷亦有諸門。
 宜勘彼論。六十五建立。一實有。二假有。三有色。四
 無色。五有見。六無見。七有對。八無對。九有漏。十無
 漏。十一有諍。十二無諍。十三有染。十四無染。十五
 耽嗜。十六出離。十七世閒。十八出世閒。十九墮。二
 十非墮。二十一有為。二十二無為。二十三所知。二

十四所識。二十五所緣法。六十六建立。二十六四
 食住持法。二十七有異熟。二十八無異熟。二十九
 有因。三十無因。三十一有果。三十二無果。三十三
 緣生法。三十四內法所攝。三十五名色所攝。三十
 六執受。三十七非執受。三十八大種所造。三十九
 非大種所造。四十有。四十一非有。四十二有上法。
 四十三無上。四十四應修法。四十五去。四十六來。
 四十七今。四十八欲界。四十九色界。五十無色界
 法。五十一善。五十二不善。五十三無記法。五十四
 學。五十五無學。五十六非學非無學。五十七見道。

所斷五十八修道所斷五十九非所斷法。六十甚
 深法。雖以前已廣別建立。蘊仍未總立。五十六蘊
 中建立。一有色。二有見。三有對。四有漏。五有為。六
 有諍。七有味。八耽嗜。九世閒。十墮界。十一過去。十
 二未來。十三現在。十四內。十五外。十六麤。十七細。
 十八劣。十九妙。二十遠。二十一近。二十二欲界。二
 十三色界。二十四無色界。二十五善。二十六不善。
 二十七無記。二十八學。二十九無學。三十非學非
 無學。三十一見斷。三十二修斷。三十三無斷。無色
 等翻前十門。合四十三。翻前有色等十門。四十四

釋蘊積聚義四義釋四十五名色名名所由四十
 六攝四十七相應四十八諸蘊假實界中建立界
 一相文小違對法二實有二假有三眼及界四句
 四同分彼同分五合不合能取六唯所取亦能取
 七因助能取八欲界九色界十無色界十一通三
 界十二執受非執受十三種種界非一界無量界
 十四界義十五涅槃及空名界十六由何說界十
 七因誰分別十八有色無色等十門十九根見識
 見耶當對法第二次第二十一問答分別中色
 界鼻舌所以當對法第二二十二第二定既無尋伺如

何生根識等文大二十三眼耳等生一一所由當對法第二
 二十四識依一根為二耶當對法第二二十五眼
 根及識成因果性二十六生欲界諸天決定有二
 十七色界諸界決定有處以八門好
 問蘊界處中云何實有幾是實有為何義故觀實有
 耶答謂不待名言此餘根境是實有義一切皆是實
 有為捨執著實有我故觀察實有所以建立此三問
 者為斷相事二愚及增益執故云何實有者辯實有
 相為斷相愚一切實有者為斷事愚捨著實我者為
 斷增益執如是餘處如理應知不待名言根境者謂

不分別色受等名言而取自所取義不待此餘根境者謂不待此所餘義而覺自所覺境非如於瓶等事要待名言及色香等方起瓶等覺。

不待名言根境等者此中總意謂若根不待名言而能取自所取境若境不待名言而能為自根取皆是實有。故總合言不分別是色受等名言而取自所取義義言境也若此根不待於所餘而能覺自所覺若此境不待於所餘而能為自根覺皆是實有。故總合言不待此所餘義而覺自所覺境如言瓶境待瓶名方能為自根所取顯自瓶用此瓶

體要待色香等餘方能為自根所覺之境謂瓶無體唯有其名待色香等方成瓶用故是假有色等不然故是實有。六十五云謂若諸法不待所餘不依所餘施設自相是實有相若待若依是假有相。如待色依色施設我等我等故假色等是實。乃至待有為諸法相事。假立生等廣說二十不相應唯待依色假立虛空虛空無為唯以名中閒不轉為待為依假設無想滅定等。彼釋此者以就理而論一切實有者謂真如真如不待名餘故舉色受等意在所依真如。彼又釋唯五識及同時意并定心

取現量境不待名言此餘故實有若比非量不得
 法自相待名及餘故皆假第一百說實有相與此
 亦同唯識第二言法之自相假智及詮俱不能著
 故現量所得是實餘是假有此解稍好六十五中
 唯言若依清淨色識所行色現量所行若餘所行
 名非現量所行者此據多分散心位說秦法師云
 正智不待名及不待後得智餘緣真是實後得智
 不待名及餘正智緣諸法是實有若待便假今解
 正智不待後得依他名及餘能緣故實後得不待
 徧計名及餘緣故實翻此為假佛地亦有此文此

中諸釋皆是小分言一切者少分一切非瓶盆等
 亦實有故不待名言及此餘之一切故

云何假有幾是假有為何義故觀假有耶謂待名言
 此餘根境是假有義一切皆是假有為捨執著實有
 我故觀察假有。

假中立一假二假兩種三假四假六假一假者此
 中等待名為假諸法詮得皆待名故待此餘者互
 相形待方得顯故此二義一切法皆假乃至涅槃
 亦有名佛地第三廣百論說一切法假亦同於此
 謂觀待一假二假者於前假中分待名及此餘為

一待名有三。一者體無待名安立。謂計所執。餘二便實。二者體無待生。待名方得起。卽依他亦假待名。言熏習而體方有故。三體無待名方顯。有時或失彼名。如瓶若破。失瓶名故。非如青等名無礙。轉一切不失故。無爲中擇滅等假。有爲中隨其所應。瓶等忿等皆是假有。此第二應第三。此第三應第二。門說漸次法等。此依六十五有此後文。其待此餘亦爲三重。準名爲之。有有體假無體假無爲中真。如有體虛空等無體故。有爲中色等有體瓶等無體。餘類可知。故有二假三假者。一種三智品三

假品。仁王經亦有。一名假卽能詮名。二受假卽有情。是今大般若云有情假。三法假唯五蘊緣生法。卽前一假別開能詮所詮所詮類多。或依總法立受假。依別法立法假。或今大般若二種。二假者唯識第八三假。一聚集。二相續。三分位假。於第三待所餘假類差別。其擇滅等卽分位假。不爾以通無爲。勘之體如彼出。四假者大智度論。一因生假亦名緣生假。從前生後。如因善惡生苦樂等。二因成假亦名緣成。是有爲通有無體。眾生無體善有體。故三相待假亦名相形。謂如有無相待等。四相續

假諸有爲法前後相續性。如智度論說六假。瑜伽
 第一百卷說。一聚集假。謂我等。二因假。謂未來法
 可生諸行。有其因故。三果假。謂擇滅。是道果故。四
 所行假。謂過去已滅諸行。唯心所行。無有體故。五
 分位假。謂不相應法。六觀待假。謂虛空待色。無非
 擇待法。無廣如彼說。此中依世分。一謂因所行。三
 中相續分位假。今開三種。有爲總立一名。分位假
 無爲。開爲二。道果非道果別故。謂果假。觀待假。前
 聚假。卽如自名顯。謂假有情。瓶舍軍等。此等諸假
 五法三性。一出體。二釋名。三性分別。四漏無漏。五

以一攝。二攝。三攝。四。乃至以六攝。一攝。三四等皆
 應準知。然勘護法清辨。瑜伽百論立假不同。此論
 假實中。皆言斷實我相。何故世俗中言雜染我。勝
 義中言清淨我。卽別也。答此等已下。不可尋其所
 以。或斷外道小乘執我法我。或約法界有情執說
 我。設爲此執。遮之。此等如下。一準知。
 諸假中以五門分別。一列名字。二出體性。三彰廢
 立。四辨相攝。五諸門分別。一三性。二有漏無漏。三
 三界。四見斷等。五五聚法。

云何世俗有幾。是世俗有爲何義。故觀世俗有耶。謂

雜染所緣是世俗有義一切皆是世俗有爲捨執著
雜染相我故。觀察世俗有雜染所緣者能發一切雜
染義故。雜染相我者執我爲雜染因故。云何勝義有
幾是勝義有爲何義故。觀勝義有耶。謂清淨所緣是
勝義有義一切皆是勝義有爲捨執著清淨我相故。
觀察勝義有清淨所緣者爲得清淨緣此境界是最
勝智所行義故。一切皆是勝義有者以一切法不離
眞如故。諸法無我性是名眞如。彼無我性眞實有故。
世俗勝義中明四俗四眞如。別鈔說雜染相我者
我體實淨能爲染因。相狀似染名染相我。作者我

假也有漏三性皆名雜染。此心所緣皆成世俗故。
一、空眞如等四種皆是世俗。或約親所緣卽少分
一切。或立一二諦謂眞俗。二二諦謂人法。三二諦
謂假世俗行俗顯了俗等。四二諦謂世閒等。此中
依可破壞故名世俗有。唯依非安立名勝義有。與
第一百同。唯勝義名勝義故。如六十四唯立一勝
義故。有義通四勝義。勝智所緣故。以一切法不離
眞如。舉眞智卽兼後得故。唯除所執非聖境故。第
一百卷唯說眞如爲勝義。此中亦說清淨所行唯
眞如也。

云何所知幾是所知為何義故觀所知耶謂所知有五種色心心所有法心不相應行無為色謂色蘊十色界十色處及法界法處所攝諸色心謂識蘊七識界及意處心所有法謂受蘊想蘊相應行蘊及法界法處一分心不相應行謂不相應行蘊及法界法處一分無為謂法界法處一分若依是處雜染清淨若所雜染及所清淨若能雜染及能清淨若於此分位若此清淨性由依此故一切皆是所知處者謂色法所染淨者謂心法能染淨者謂貪等信等心所有法如其次第分位者謂於色心及心所分位假立心不

相應行法清淨性者謂清淨無為法如其所應非一切所以者何唯法界及擇滅是清淨性故

此中本解論第二段解所知中色即善顯揚等心為善心是主故色為染淨依故各據一義亦不相違其宗輪說大眾部等說一切法處非所知非所識是所通達今對於彼故說三門今大乘皆得皆託為本質故或自體分等盡故或顯不同大眾等非所知不同薩婆多等實義是所知今顯為本質亦親所知性不同二宗

又所知法者謂信解智所行故道理智所行故不散

智所行故內證智所行故他性智所行故下智所行
 故上智所行故厭患智所行故不起智所行故無生
 智所行故智智所行故究意智所行故大義智所行
 故當知此中以十三種智所緣境界顯示所知義十
 三智者謂聞所生智思所生智世閒修所生智勝義
 智他心智法智種類智苦智集智滅智道智盡無生
 智大乘智如是諸智隨其次第是信解等智他心智
 名他性智者謂緣他心為境故法智名下智者謂於
 諸諦最初生故種類智名上智者謂從法智後所生
 故為厭患故名厭患智為不起故名不起智緣無生

故名無生智緣智故名智智緣究竟故名究竟智緣
 大義故名大義智自利利他名為大義為捨執著知
 者見者我故觀察所知。

十三智。一釋名。二出體。三善等漏等世閒等分別。
 四加行等三智相攝。五約十三智相攝。六智相攝。
 六十九廣明十一智義。謂十智加十力智。然此大
 義通自他利彼十力智唯利他。此寬彼狹。四智相
 攝中四智佛地緣境。既有二說。相攝應知。

十三智以五門分別。一顯增減。謂或說二智謂如
 理如量亦名真俗諦智。或三謂三慧及加行等。或

說四。謂四智品義。或說十。如顯揚第二。或說十一。如瑜伽六十九。或說十三。如此中說。此下有錯二簡殘缺出體三。辨差別。四廢立。五諸門分別。一三性。二世出世。三漏無漏。四相攝。五修差別。六三解脫門等攝。廢立者十智。謂應但分別。一謂俗真。俗中別開。二謂他心世俗。以記心輪勝。故別開他心。解諸境智等一切。并名世俗智。於勝義中亦應。二謂法類。初得後得。此有上下體名。寬故緣理。緣智故對法。云法智品真如為境。類智品法智為境。或依緣下界上界。六十九說見道對治。法智斷欲界諸惑類。

智斷色無色界。或說別異名。此不總名。即如三心見道。然以四諦理差別。隨境說名。四諦智。即此真俗諸智。在果位勝名。盡無生。然緣境有無。以分為二。六十九中。以此十智通三乘。有依不共智。後立十力智對法。以俗智境有差別。故別聞思修。以一切真智對俗智。立總名勝義智。以盡無生。同在無學。合名究竟智。以十力智行。唯利他。諸智差別者。六十九說。謂有五品所知差別。及此五品所知作業。一假立故名所知。二勝義故名所知。三所作究竟所知。四他心淨不淨行所知。五一切種別所知。

世俗智能知假立如實了知世俗道理善不善有
 罪無罪乃至緣生法等一分應遠離一分應修習
 又了言說遊行世間隨因隨緣而起眾行法類四
 諦智能知勝義所知能證見修所斷法盡智無生
 智能知所作究竟心得決定無有疑惑於自斷中
 離增上慢他心智能知他心淨不淨行所知如實
 了知所有意樂界及隨眠十力智能知一切種別
 所知能正於他起教授教誡能斷一切有情疑惑
 能善安置一切有情於善趣果及解脫中有大勢
 力能作一切有情利益及安樂事十三智中勝義

智卽法等六智大乘智卽十力智然通二利十力
 智唯利他合盡無生二爲究竟智開世俗智爲聞
 思修其聞思修如後當說其法類四諦智差別觀
 非正斷惑是見修遊觀道乃至十三智無有差別
 觀而斷惑者若於真斷道中義說爲法類四諦智
 等亦無過失由彼法類差別觀者略有四例所謂
 別總觀劣勝觀如智境初後得起卽對法十三智
 云下智者於諦初觀故上智者後觀故此如觀別
 總境及觀欲界劣境色無色勝境觀如及智境此
 下上言通故卽顯真無間道名法初起故真解脫

道名類後起故前之類故唯識鈔等但有三文三
 例今以理徵此文復總故分別盡無生智當知唯
 於漏盡中生若不分別盡及無生謂我已得諸漏
 永盡我未來若不復當生者唯是無漏唯出世間
 若作如是分別者唯是無漏世出世間世俗智攝
 亦非自利又唯在果不在於因今顯位通心分即
 兼識境故說十二然此諸智依境辨智緣真者總
 名如理智緣俗者總名如量智即此二種在有漏
 位勤功欣趣總名加行以所緣境總有相故在無
 漏位境有理事分成二智謂正及後後唯緣俗仍

名為事不證真故。如是有無漏智從境因分三慧。
 緣外教境成名聞慧從理境名思慧依定因名修
 慧。

十三智法類三例如下。

云何所識幾是所識為何義故觀所識耶謂識無分
 別故有分別故因故轉故相故相所生故能治所治
 故微細差別故當知是所識義無分別者謂五識身。
 有分別者謂意識身。因者謂阿賴耶識轉者謂所餘
 識。

淨八識以六門釋。一轉染成淨。二釋名出體。三心

所相應多少。四照境。五明本質影像緣真如等。六位起先後。

莊嚴論第三。攝論第九。佛地第三。唯識第十等說。轉識得智等。彼師云。第九菴摩羅識。楞伽云。三名。知相識。一名真相識。四卷楞伽云。此名真相識。菴摩羅識。此名依止明真如。與一切有為無為為依止。故十八空論云。地上觀自性清淨心。菴摩羅識。實性論偈云。無始世來性。作諸法依止。依性有諸道。及證涅槃果。舊梁論云。此界無始時。一切法依止。若有諸道。有及有得涅槃勝鬘云。如來藏即法。

身藏。十卷楞伽八九種種識者。此論名心轉依真如為體等。難入地不得起成事智。第七與六染淨同。故可得相依。五根及識染淨不殊相依起。彼彼云。六七同聚五根識不同聚不為例者。不然五根五識不相違故。

相者謂根及義。相所生者謂根義所生諸識。能治所治者謂有貪離貪有瞋離瞋有癡離癡如是等微細差別者。謂七種難識了別差別故。七種難識了別者。一不可知了別器了別。謂一切時無分別行相故。

第一不可知明內執受器了別外器。

所識中七種難識中不可知了別器了別中法亦
 應有執受舉外顯內舉廣小亦應有第八行相不
 可知了別今明所了能了行相即第二門了然七
 難識各破小乘。一一如理思。此段有
 缺失
 二種種行相了別謂一法一行有種種相此難建立
 是故微細三俱有了別謂一時聞諸識俱起云何各
 別了自境界此難建立是故微細當知此微細言通
 一切處四能治所治速疾迴轉了別謂具縛者云何
 有貪等心須與轉變起離貪等心五習氣了別謂諸
 業現行熏習於心云何非離心外別有習氣亦非即

心又與果時次第而轉六相續了別謂無量種感自
 身業熏習在識云何於餘明了將命終位暫起覺悟
 餘業熏習轉於異趣令生相續七解脫了別謂阿羅
 漢心證得第一無戲論法性超過生死曾所積習一
 切種有漏行云何此心行相流轉此難建立是故微
 細如是當知一切皆是所識為捨執著能見者等我
 故觀察所識見者等言當知為顯見者聞者嗅者嘗
 者觸者識者云何所通達幾是所通達為何義故觀
 所通達耶謂轉變故隨聞故入行故來故往故出離
 故是所通達義言所通達者謂六神通所有境界以

如意通運轉差別所顯故說此所通達境界名為轉
變以天耳通了達種種異趣音聲故名隨聞以他心
通了有貪等種種心行故名入行以宿住通了過去
生展轉來事故名來以天眼通了達未來所往生事
故名往。

天眼通云緣未來以能導故實意緣未來眼知現
在事如六十九。

以漏盡通了知解脫三界方便故名出離。如是一切
皆是所通達後以三通徧緣一切境界故為捨執著
有威德我故觀察所通達。

六神通六十九說一神境智作證通二天耳智作
證通三心差別智作證通四宿住隨念智作證通
五生死智作證通六漏盡智作證通。一釋名一出
體二修異四作業五諸門分別。一釋名者妙慧難
測名神所作無壅為通從一變多隨其分限身自
在轉是名神境。由神境智於此境界領受示現名
為神境若智具大威德修所成是修果名神境智。
此智於彼境能領受能示現故名神境智。即此智
種子由生緣所攝受故勢力增長相續隨轉名神
境智作證。如是一切總攝為一名為神境智作證。

通神之境神境之智皆依主智卽作證作證卽通持業釋謂若修果耳所攝清淨色是名天耳與依耳識相應智名天耳智此作證等如前應知總名爲一亦準如前應知天耳之智作證等如前謂諸他心由有貪等差別而轉名心差別若具大威德修所成是修果緣彼爲境智名心差別智餘如前說心差別之智作證等釋名如前若於過去自體差別名宿住明了記憶名隨念若智具威德修所成是修果依止於念與念相應此方得轉是故名宿住隨念智事去名宿久居稱住住卽宿住宿住

之隨念隨念之通釋名如前若諸有情好惡色等種種差別從彼別別有情眾沒於此別別有情眾生說名生死若修果眼所攝清淨色以爲依止緣死生境識相應智名生死智此意若言生死智意識與眼識從境爲名若言天眼智卽從所依及門爲目皆依主釋若一切結無餘永斷名爲漏盡卽於此中世閒盡智及無生智名漏盡智以此別教授教誡知三世等故唯世閒攝餘如前說然顯揚云神境智見作證通乃至漏盡智見作證通皆說是見性故分別推求故一出體者神境通若在異

生對法等說為利益通善若為嬉戲是無記也天
 眼天耳亦通善及無記起下地唯無記自地上地
 者通善無記宿命他心是善并以有漏慧為體瑜
 伽論說若在三乘有學五通并有漏在無學并無
 漏此依離漏名無漏其神境天眼天耳性在三乘
 實非無漏其宿命他心無漏他心漏盡六十九說
 他心三乘實非無漏其宿命他心漏盡六十九說
 他心通取有學無學有學是世閒然無漏漏盡亦
 無漏然是世閒此之一種通狹智寬若以世俗智
 為性亦通有漏三乘說法未真無漏離漏故得名

宿命通無漏亦緣若在大乘十地得無漏五識可
 通無漏若不得天眼耳唯有漏神境唯意識及智
 可通無漏宿命他心亦復如是通迴為菩薩故簡
 直往故至佛并無漏并後得智攝是世閒故依智
 出體如佛地第三有為功德四智所攝即入識俱
 有天眼耳通等六通多分攝在妙觀察智神境智
 通多分攝在成所作智漏盡通若說漏盡相續中
 有四智所攝若說緣漏盡涅槃為境多分攝在大
 圓鏡智平等性智以識所依身三化中有現神通
 化故云多分攝神境智其漏盡通瑜伽唯約利他

爲首故世閒攝此約通二利論故多分二智攝然
除通壅小乘五通各一無閒一解脫第六非想第
九品無閒以解脫道今大乘無文無閒解脫道不
定成滿之位非頓能故如修輕舉想雖輕舉未來
等十地神通展轉增勝非一無閒解脫卽圓滿故
四十七云初地菩薩一刹那頃瞬息須臾能證菩
薩百三摩地以淨天眼能於種種諸佛國土見百
如來以神通力動百世界亦能往乃至自茲已去
是諸菩薩由願力故當知無量威力神變三修法
有異者瑜伽三十三說大好修十二想此依二乘

異生爲論非菩薩菩薩力有三一神通修得雖未
見修之法用然準三十七初但總聞神通法教後
以定作意思惟彼法義修習多修習故有勝有劣
發生修果此意亦從地前菩薩未得俱生威力何
妨亦依此修後入地已但入三昧折伏定障故得
通果彼卷亦具說三種威力一法威力行六度所
得卽法華經明六根功德二俱生威力法得是報
四作業者此業因如六十九五諸門分別者一名
廢立何故唯二立天二識廢立眼識例三識二用
廢立隨所許用分者四地廢立依何地五威勢廢

立生得方便。三十三有文漏盡唯方便名廢立中
 一神境得神名餘不得用事顯現作業勝故天眼
 耳以天為名餘不爾簡別人中故識廢立中何故
 不說七八識為通據實亦是以隨三乘因及異生
 不說或利他者眼耳六識故鼻舌身何故非通作
 用不廣諸根互用據實皆得十住斷結經身入品
 如來身通無能限量鼻通倍不可計舌通廣無邊
 際就三乘通說故說六為通今有解云此之六種
 作用廣勝故名通菩薩地亦說為通非餘故薩遮
 尼乾子經天耳知過去未來音聲皆盡本際奮迅

往問經明五通菩薩宿命通知未來法集經明菩
 薩宿命知三世法華經法師功德品云得六根淨
 何故餘三根非通從二乘異生為名或從初為名
 用廢立者世用如作境用何故宿住二乘能緣五
 蘊他心不能生死能緣五蘊他心現在若緣色相
 緣智不名為通五蘊知彼四蘊知智者名達地廢
 立依何地者唯依根本靜慮三十三說依根本靜
 慮能發六十九說亦同餘定雖菩薩等亦能起變
 化事非通作用狹故威勢廢立者凡夫聲聞獨覺
 菩薩佛六通分齊上下修神足天耳聞遠近天眼

見長短。他心知界限。宿命知久近。漏盡二乘果。其別相應知。

云何有色。幾是有色。為何義。故觀有色耶。謂色自性。故依大種。故喜集。故有方所。故處徧滿。故方所可說。故方處所行。故二同所行。故相屬。故隨逐。故顯了。故變懷。故顯示。故積集。建立。故外門。故內門。故長遠。故分限。故暫時。故示現。故是有色義。

有色門中六十五。唯約色蘊辨。此乃通相。

色自性者。謂即用色法為自性。故名為有色。非與餘色合。故名為有色。是故最初說色自性。依大種者。此

顯與餘色合。故名有色。諸所造色與大種色合。故名有色。諸大種色展轉合。故名有色。喜集者。即有色法。以喜為集。名為喜集。非如現在喜愛。以先觸受等為集。名為喜集。

喜集色者。即是前自性等諸門喜受等心。積集諸色。此色從愛等心所集。故名喜集。不同十二支中。現在此身喜愛支。從前觸受支等為緣。集起此愛支等。名為喜集。此亦稍難。

有方所者。有分量故。處徧滿者。形量徧十方故。方所可說者。可說在此。在彼方。故方處所行者。謂隨所住

方所緣性故。二同所行者謂二有情共所緣性故。非如無色法。如自所受他不能取。故相屬者謂眼識等亦名有色繫屬有色根故。隨逐者謂生無色界異生諸色種子所隨逐。故顯了者謂諸尋思由能顯了所緣境故。變壞者謂五蘊由手等所觸受等所切隨其所應。即便變壞。以變壞是色義。故顯示者謂諸言說顯示義。故積集建立者謂極微已上色有微細分可建立故。外門者謂欲界色。妙欲愛所生故。內門者謂色界色。定心愛所生故。由此道理說彼諸色名。意生身長遠者謂異生色。不可建立前後兩際有邊量故。

分限者謂有學色。已作生死分限故。暫時者謂無學色。唯餘現在一有身故。示現者謂如來等所現諸色。唯是示現非真實故。一切皆是有色。或隨所應。一切是有色者。謂變壞色等。隨所應者。謂餘色。外門等六色。差別當知與受等共。為捨執著有色我故。觀察有色。

一切有色謂變壞色等者。等取餘四門。謂前變壞相屬顯了顯示以無為等。是相屬中攝也。無為屬色。色上顯故。一一別出無為。可知識等變壞等餘十門。并外等分別。或隨所應。謂餘色者。謂餘十七

門此亦不然。以下六門通五蘊卽有十種在故。外門等六者謂以下六種通五蘊非唯色蘊故言與受等者此意說言論雖說隨應謂餘十種唯在色蘊。今外門等六可共受等五蘊義。

云何無色幾是無色爲何義故觀無色耶。謂有色相違是無色義。一切皆是無色或隨所應爲捨執著無色我故觀察無色。一切是無色者謂與無色相繫屬故云何有見幾是有見爲何義故觀有見耶。謂眼所行境是有見義。餘差別如有色說謂如前說色自性等乃至示現說名有色。如是有見自性等乃至示現

說名有見。一切皆是有見或隨所應一切是有見者謂相屬有見等所以者何。諸無色法與有見色相屬故亦名有見爲捨執著眼境我故觀察有見。

有見中眼境我者我爲眼境也。今彼此設遮計等隨義準知。彼云計色塵是我眼境。今解是眼之境名爲有見非我眼境也。

云何無見幾是無見爲何義故觀無見耶。謂有見相違是無見義。一切皆是無見或隨所應爲捨執著非眼境我故觀察無見。

非眼境我與上相翻。

云何有對。幾是有對。爲何義。故觀有對耶。謂諸有見者。皆是有對。又三因故。說名有對。謂種類故。積集故。不修治故。

有對中一有見有對。卽諸有見者。皆是有對。二無見有對。謂種類故。三因所明是。三無見無對。卽損害之依處是。不可言諸有見是前。有見門中法門。是此有對。此中說於損害依處。下言有如是義。故一切是有對故。然六十五唯約有無見有對說。故云體。

種類者。謂諸色法互爲能礙。互爲所礙。能礙往來是

有對義。此唯應言互爲能礙。所以復言互爲所礙者。爲建立光明等色。是有對故。以彼唯是所礙。非能礙。性自爾故。種類是自性義。

謂所以復言互爲所礙者。爲建立光明等色。是有對故。此中但說光明及等取闇影像迴色等。唯所礙者。卽應法處不對法極迴。以唯爲所礙。通光明故。今解其光明色。亦是能礙。以闇影故。以雖亦能礙於積集形等色。不能爲能礙。故略言互爲所礙。又解舉光明體等取迴色等業。以光明亦爲能礙。闇影等故。迴色但爲所礙。體卽光明而不能礙。故

於法處但名極迥不名極光及極明等以諸色性
 爲能礙等自性如是故言種類是自性義此中三
 因明無見有對故除定境色以是無見無對故。
 積集者謂極微已上以一極微無對礙故不修治者
 謂非三摩地自在轉色定自在力所轉諸色無對礙
 故如平等心諸天
 平等心諸天者彼名天淨居諸天佛在世時佛邊
 聽法住一毛端量無數億不相障礙如涅槃會上
 他方無邊身所生之處如錐頭針峰以因平等故
 名平等意又解卽諸靜慮皆然就此諸相境并是

前種類積集二因中收以定境色舉平等天色以
 喻於彼不修治者所以非此天之色又解此非定
 力所生卽亦除平等心天色以修治定爲因故此
 雖卽是前二因收然非第三因也決擇分云有等
 心天曾於人中盡磨瑩心故一毛端空量地界又
 正法念經六十四卷於一手等量五百天不相妨
 礙亦不迫隘卽是諸天有此功能
 又損害依處是有對義謂若依若緣能生瞋恚名爲
 有對。

損害依處者若有漏無漏能生損者皆是處或是

依。

卽以如是有對義故一切皆是有對。或隨所應謂所
餘義爲捨執著不徧行我故觀察有對。云何無對。幾
是無對爲何義故觀無對耶。謂有對相違是無對義。
一切皆是無對。或隨所應爲捨執著徧行我故觀察
無對。

不徧行我者以我有對故非徧行。

大乘阿毘達磨雜集論述記卷第十二